

共同經課-1 撒母耳記上十五章三十四節～十六章十三節

34 撒母耳去拉瑪。掃羅上去伊的厝，到掃羅的基比亞。35 撒母耳到伊死的日，無閣來見掃羅；因為撒母耳為著掃羅憂悶，耶和華因為設立掃羅做以色列王也退悔。1 耶和華給撒母耳講：「我已經棄揀掃羅無互伊做以色列王，你為著伊憂悶欲到佹久啊？你著用角貯油滿滿，去啊，我欲差你去伯利恆人耶西遐；因為我佇伊的子的中間，備辦一個王。」2 撒母耳講：「我怎樣通去？掃羅若聽見，伊欲劊我。」耶和華講：「你通帶一隻牛仔及你去，就講：『我來是欲祭獻耶和華。』」3 你著請耶西來赴此個祭祀，我欲指示你所應該行的事。我所指示你的人，你著替我給伊抹油。」4 撒母耳就照耶和華的話去行。到伯利恆，城裡許個長老攏愕愕出來迎接伊講：「你來是為著平安嗎？」5 伊講：「為著平安，我是欲祭獻耶和華。恁著清氣家己，來及我赴祭祀。」撒母耳就互耶西及伊許個子清氣，叫 in 來赴祭祀。6 in 已經來，撒母耳看見以利押，意思講，耶和華所欲抹油者果然佇伊的面前。7 總是耶和華給撒母耳講：「莫得看伊的容貌及伊身軀的大漢，此人是我所拒絕。因為耶和華啲看無親像人啲看：人看外貌；耶和華是看心內。」8 耶西叫亞比拿達互伊對撒母耳的面前經過，撒母耳講：「耶和華也無揀此人。」9 耶西閣叫沙瑪經過，伊講：「耶和華也無揀此個。」10 耶西互伊許個子七個攏對撒母耳的面前經過，撒母耳給耶西講：「耶和華也無揀諸個。」11 撒母耳給耶西講：「你的子攏佇遮嗎？」伊應講：「猶有一個斂尾的，今啲飼羊。」撒母耳給耶西講：「你差人導伊來；因為伊猶未來，咱無欲坐桌，」12 就差人導伊入來。伊是赤色，目矚清秀，生做好看。耶和華講：「此人就是，你起來給伊抹油。」13 撒母耳就用角內的油，佇伊許個兒的中間抹伊。對彼日起，耶和華的神大大臨到大衛，撒母耳起身倒去拉瑪。

共同經課-2 詩篇二十篇

1 [大衛的詩，交互樂官。] 願耶和華佇患難的日聽你；願雅各的上帝的名安置你佇高的所在。2 對聖所幫助你，對錫安扶持你，3 記念你一切所獻的，接納你的燒祭，(細拉) 4 照你的心所愛的互你，成你一切的計劃。5 阮欲因為你的救恩來唱歌，阮欲奉阮的上帝的名來豎旗。願耶和華成你一切所求的！6 今我知耶和華救伊受抹油者，欲對伊聖的天聽伊，用伊正手的氣力救伊。7 有人倚靠車，有人倚靠馬，獨獨阮欲講起耶和華——阮上帝的名。8 in 仆落跋倒，阮就起來，倚在在。9 求耶和華拯救；阮求叫的時，願王聽阮！

共同經課-3 哥林多後書五章六節～十節、十四節～十七節

6 所以，阮常常好膽，知阮惦佇身軀就是及主相離。7 因為阮啲行是對信毋是對所看。8 按呢阮好膽，也閣卡歡喜離開身軀及主相及惦。9 所以，無論惦佇身軀，抑是離開身軀，阮所致意的，是互伊歡喜。10 因為咱眾人的確著顯明佇基督的公座前，互逐人照伊對身軀所行的代誌，或是好或是歹來受報應。14 因為基督的疼痛催迫阮，是阮想：一人替眾人死，就是眾人死；15 閣伊替眾人死，是欲互諸個活的人以後無為著家己來活，是為著替 in 死來復活者。16 所以，阮對今以後，無照肉體識人。雖然曾照肉體識基督，今以後無閣按呢識伊。17 所以人若惦佇基督，就是做新創造的，舊的代誌已經過去，今攏變成新的。

共同經課-4 馬可福音四章二十六節～三十四節

26 閣講：「上帝的國親像人撒種佇地裡。27 暝時困，日時起來，彼個種子發閣漸漸大，伊毋知彼個所以然。28 地自然生物：起頭是秧，後來有穗，閣後來穗就結成五穀；29 五穀已經熟，就用鋤仔，因為收割的時到啦。」30 閣講：「上帝的國，咱欲怎樣來比並伊？抑是用甚麼譬喻表明伊啊？31 是親像一粒芥菜子，撒落地，雖然比地上百項的種子卡細粒，32 若是已經撒落去，就發生，漸漸卡大佇攏總的菜蔬，閣發出大的枝，致到空中的鳥會歇伊的蔭下。」33 伊用多多親像此號的譬喻，傳道理互 in，照 in 所會聽的。34 若無用譬喻，就無給 in 講；到單單學生及伊佇啲的時，就攏總給 in 解明。